

2022 წლის შოთა რუსთაველის საქართველოს ეროვნული სამეცნიერო ფონდის პრემია -
“ქალები მეცნიერებაში” - განსაკუთრებული მიღწევებისათვის საინფორმაციო
ტექნოლოგიების მიმართულებით
კონკურსის წესი და პირობები

მუხლი 1. ზოგადი დებულებანი

1. სსიპ – შოთა რუსთაველის საქართველოს ეროვნული სამეცნიერო ფონდი აწესებს პრემიას - “ქალები მეცნიერებაში” - წარმატებული მეცნიერი ქალისთვის საინფორმაციო ტექნოლოგიების მიმართულებით, განსაკუთრებული მიღწევებისათვის.
2. ფონდის მიერ გამოცხადებული კონკურსის „სსიპ შოთა რუსთაველის საქართველოს ეროვნული სამეცნიერო ფონდის პრემია “ქალები მეცნიერებაში“ (შემდგომში - კონკურსი) მიზანია გამოავლინოს და წახალისოს საინფორმაციო ტექნოლოგიების მიმართულებით მოღვაწე გამორჩეულად წარმატებული მეცნიერი ქალი.
3. კონკურსი ხელს შეუწყობს ევროკავშირის კვლევისა და ინოვაციის ჩარჩო პროგრამა „Horizon 2020“-ის ფარგლებში დაფინანსებული პროექტის (CALIPER), რომელიც მიზნად ისახავს გენდერული თანასწორობისთვის კვლევისა და ინოვაციის დაკავშირებას, ფარგლებში დამტკიცებული „გენდერული თანასწორობის გეგმის“ შესრულებას.
4. პრემია გაიცემა ერთჯერადად, კონკურსის წესით.

მუხლი 2. ტერმინთა განმარტება

ამ წესში გამოყენებულ ტერმინებს აქვს შემდეგი მნიშვნელობა:

1. ფონდი – საჯარო სამართლის იურიდიული პირი – შოთა რუსთაველის საქართველოს ეროვნული სამეცნიერო ფონდი;
2. გენერალური დირექტორი – ფონდის გენერალური დირექტორი;
3. საკონკურსო განაცხადი - პრემიის მოპოვების მიზნით, ამ წესით განსაზღვრული პირობების მიხედვით ფონდში წარდგენილი საკონკურსო განაცხადი;

4. შეფასების კრიტერიუმები – ფონდში წარდგენილი საკონკურსო განაცხადების შესაფასებლად საკონკურსო კომისიისთვის განსაზღვრული, ამ წესით დამტკიცებული სახელმძღვანელო პრინციპები სათანადო ქულების მითითებით;

5. საკონკურსო კომისია – კონკურსზე დარეგისტრირებული საკონკურსო განაცხადების შემფასებელი კოლეგიალური ორგანო, რომელიც განიხილავს და აფასებს კონკურსში შემოსულ საკონკურსო განაცხადებს, შეფასების კრიტერიუმების შესაბამისად;

6. პრემია – გამარჯვებული მეცნიერის მიერ კონკურსის შედეგად მოპოვებული ფულადი ჯილდო;

7. პრემიის მიმღები - კონკურსის შედეგად გამოვლენილი გამარჯვებული პირი;

8. მიზნობრივი ანგარიში – გამარჯვებული მეცნიერის მიერ წარმოდგენილი საბანკო ანგარიში.

მუხლი 3. პრემიის კატეგორია და ფინანსური რაოდენობა

1. კონკურსი ითვალისწინებს საინფორმაციო ტექნოლოგიების მიმართულებით მოღვაწე განსაკუთრებული წარმატების მქონე მეცნიერი ქალის დაჯილდოებას ერთჯერადი პრემიით.

2. პრემიის ოდენობა შეადგენს 2500 ლარს.

მუხლი 4. კონკურსში მონაწილე სუბიექტები და პირობები

1. კონკურსში მონაწილეობის უფლება აქვს საინფორმაციო ტექნოლოგიების მიმართულებით მოღვაწე საქართველოს მოქალაქე მეცნიერ ქალს, დოქტორის ან მასთან გათანაბრებული აკადემიური ხარისხის მქონე პირს, რომელიც ეწევა სამეცნიერო-კვლევით ან/და აკადემიურ საქმიანობას საქართველოს სამეცნიერო-კვლევით ორგანიზაციაში ან/და უმაღლეს საგანმანათლებლო დაწესებულებაში.

2. საკონკურსო განაცხადს წარადგენს თავად პრემიის კანდიდატი.

3. საკონკურსო დოკუმენტაციის რეგისტრაცია შესაძლებელია ფონდის ელექტრონულ ბაზაში.

მუხლი 5. კონკურსის ადმინისტრირება

1. კონკურსს აცხადებს და გენერალური დირექტორის მიერ დადგენილი წესით ადმინისტრირებას უწევს ფონდი.

2. ფონდი უზრუნველყოფს:

ა) კონკურსის გამოცხადებას დადგენილი წესით;

ბ) კონკურსის ჩატარების წესისა და საკონკურსო დოკუმენტაციის მიღების ვადების დადგენასა და საჯაროდ გამოცხადებას;

გ) საკონკურსო დოკუმენტაციის კონკურსის მოთხოვნებთან შესაბამისობის დადგენას;

დ) საკონკურსო განაცხადების შეფასებას საკონკურსო კომისიის მიერ და გამარჯვებულის გამოვლენას;

ე) გამარჯვებული კანდიდატის დამტკიცებას გენერალური დირექტორის მიერ;

ვ) კონკურსის შედეგების გამოცხადებას;

ზ) კონკურსში გამარჯვებული კანდიდატის დაჯილდოებას.

მუხლი 6. კონკურსზე რეგისტრაციის წესი და წარსადგენი დოკუმენტაცია

1. მეცნიერი რეგისტრირდება GMUS-ში (გრანტების მართვის ერთიანი სისტემა) და ქმნის „მეცნიერის პროფილს“;

2. კონკურსში რეგისტრაცია ხორციელდება შემდეგი სახით:

ა) ელექტრონული რეგისტრაცია – 2022 წლის 16 მარტიდან - 4 აპრილის 18:00 საათამდე;

ბ) ფონდის კანცელარიაში რეგისტრაცია - კონკურსში მონაწილეობის შესახებ განცხადების (იქმნება GMUS-ში რეგისტრაციის დასრულების შემდეგ) წარმოდგენა – 2022 წლის 8 აპრილის 18:00 საათამდე.

3. კონკურსში მონაწილეობისათვის მეცნიერი გრანტების მართვის ერთიან სისტემაში GMUS-ში (<http://gmus.rustaveli.org.ge>) ელექტრონულად არეგისტრირებს საკონკურსო განაცხადს, რომელიც შედგება შემდეგი დოკუმენტებისგან:

ა) კრებსითი ინფორმაცია (დანართი 2, ივსება GMUS-ში პროექტის რეგისტრაციის დროს);

ბ) განმცხადებლის სამოტივაციო წერილი სამომავლო სამეცნიერო გეგმის აღწერით (დანართი 3, იტვირთება GMUS - ში PDF დოკუმენტის სახით);

გ) განმცხადებლის პროფესიული ბიოგრაფია CV გენერირდება გრანტების მართვის ერთიანი სისტემიდან - GMUS-იდან, ქართულ ენაზე (დანართი 4, იტვირთება GMUS - ში PDF დოკუმენტის სახით);

დ) დამატებითი დოკუმენტაცია: სერტიფიკატი, ჯილდო, პრიზი, პატენტი და სხვა (იტვირთება „მეცნიერის პროფილში“, GMUS - ში PDF დოკუმენტის სახით);

ე) სამეცნიერო ხარისხის დამადასტურებელი დოკუმენტი, რომელიც იტვირთება „მეცნიერის პროფილში“;

ვ) ცნობა საინფორმაციო ტექნოლოგიების მიმართულებით სამეცნიერო-კვლევითი ან/და აკადემიური საქმიანობის შესახებ, 2022 წლის მდგომარეობით. (იტვირთება GMUS - ში - „მეცნიერის პროფილში“, PDF დოკუმენტის სახით);

ზ) მხარდაჭერის წერილი ინსტიტუციიდან (დანართი 5, იტვირთება GMUS - ში PDF დოკუმენტის სახით);

თ) განცხადება კონკურსში მონაწილეობის შესახებ (დანართი 6, გენერირდება GMUS-დან).

5. კონკურსში გამარჯვების შემთხვევაში მეცნიერმა უნდა წარმოადგინოს მიზნობრივი ანგარიშის რეკვიზიტები, რომელზეც ჩაირიცხება პრემიის თანხა.

6. ვადის დარღვევის, ყალბი ან/და არასრული დოკუმენტაციის წარმოდგენის შემთხვევაში პრემიაზე წარდგენილი საკონკურსო განაცხადი ფონდის მიერ საკონკურსოდ არ განიხილება და მოიხსნება.

მუხლი 7. პრემიის გაცემის პროცედურა

გამარჯვებული კანდიდატისათვის პრემია გაიცემა უნაღდო ანგარიშსწორებით, მე-3 მუხლში მითითებული კატეგორიისა და ოდენობის შესაბამისად, საქართველოს კანონმდებლობით გათვალისწინებული გადასახადების ჩათვლით.

მუხლი 8. საკონკურსო განაცხადების შეფასება

1. ფონდის გენერალური დირექტორი ინდივიდუალური ადმინისტრაციულ-სამართლებრივი აქტით ქმნის დარგობრივ საკონკურსო კომისიას და განსაზღვრავს მის მუშაობის წესს;

2. შეფასება ხორციელდება კომისიის მიერ ამ წესის მე-10 მუხლით განსაზღვრული შეფასების კრიტერიუმების გამოყენებით.

3. საკონკურსო კომისია განიხილავს და შეფასების კრიტერიუმების შესაბამისად აფასებს კონკურსში დარეგისტრირებულ საკონკურსო განაცხადებს; ადგენს რანჟირებულ სიას; გამოავლენს გამარჯვებულს და დასამტკიცებლად წარუდგენს ფონდის გენერალურ დირექტორს;

4. გენერალური დირექტორი ინდივიდუალური სამართლებრივი აქტით ამტკიცებს საკონკურსო კომისიის მიერ გამოვლენილ გამარჯვებულ საკონკურსო განაცხადს.

მუხლი 9. ინტერესთა კონფლიქტი

1. დაუშვებელია საკონკურსო კომისიის წევრი იყოს ამავე კონკურსის მონაწილე.

2. დაუშვებელია საკონკურსო დოკუმენტაციის შეფასების და დამტკიცების პროცესში მონაწილეობდეს საკონკურსო კომისიის წევრი:

ა) რომელსაც აქვს საერთო პუბლიკაცია კონკურსის მონაწილეებთან ან მონაწილეობდა მათთან ერთსა და იმავე სამეცნიერო-კვლევით პროექტში ან მუშაობს ერთსა და იმავე სტრუქტურულ ერთეულში (ფაკულტეტი, ინსტიტუტი, დეპარტამენტი);

ბ) რომელმაც შესაძლოა მიიღოს უშუალო პროფესიული, ფინანსური ან პირადი სარგებელი საკონკურსო განაცხადის გამარჯვების ან დამარცხების შემთხვევაში;

გ) რომელსაც აქვს საკონკურსო განაცხადის ავტორებისაგან ფუნდამენტურად განსხვავებული პოზიცია;

დ) რომელიც თვითონ არის დაინტერესებული; კონკურსის მონაწილის ნათესავია; კონკურსის მონაწილის წარმომადგენელია; შრომით ურთიერთობაშია კონკურსის მონაწილესთან.

3. ამ დებულების მიზნებისათვის ნათესავად ჩაითვლება:

ა) პირდაპირი ხაზის ნათესავი;

ბ) მეუღლე, მეუღლის და-ძმა და პირდაპირი ხაზის ნათესავი;

გ) აღმავალი ხაზის პირდაპირი ნათესავის და-ძმა;

დ) და-ძმა, მათი მეუღლეები და შვილები.

4. საკონკურსო კომისიის წევრი ვალდებულია გენერალურ დირექტორს ოფიციალურად აცნობოს ამ მუხლში აღნიშნული გარემოებისა და თვითაცილების შესახებ.

5. იმ შემთხვევაში, თუ ინფორმაცია საკონკურსო კომისიის წევრის ინტერესთა კონფლიქტის შესახებ ფონდისთვის ცნობილი გახდება დასაფინანსებლად შერჩეული პროექტების დამტკიცებამდე, ფონდი უფლებამოსილია იმსჯელოს შესაბამისი საკონკურსო კომისიის წევრის მიერ გაკეთებულ შეფასების გაუქმების შესახებ.

მუხლი 10. საკონკურსო განაცხადების შეფასების კრიტერიუმები

საკონკურსო განაცხადები შეფასდება შემდეგი კრიტერიუმების გათვალისწინებით:

1. სამეცნიერო-კვლევითი საქმიანობა	1	2	3	4	5	მინიმუმ 1 ქულა მაქსიმუმ 5 ქულა
სამეცნიერო კომპეტენცია, კვლევითი საქმიანობის აქტუალობა და პრაქტიკული ღირებულება						
2. აკადემიური კომპეტენციები	1	2	3	4	5	მინიმუმ 1 ქულა მაქსიმუმ 5 ქულა
სამეცნიერო ნაშრომები ბოლო 5 წლის განმავლობაში; სამეცნიერო ღონისძიებებში მონაწილეობა; საერთაშორისო და ეროვნულ სამეცნიერო პროექტებში მონაწილეობა; საერთაშორისო /ეროვნული ჯილდოები, პრიზები, სტიპენდიები, წევრობა და სხვა						
3. ცოდნის გადაცემისა და გავრცელების ხელშეწყობა;	1	2	3	4	5	მინიმუმ 1 ქულა მაქსიმუმ 5 ქულა

4. სამოტივაციო წერილი და სამეცნიერო გეგმები	1	2	3	4	5	მინიმუმ 1 ქულა მაქსიმუმ 5 ქულა
შემაჯამებელი ქულა და კომენტარი						

ა) კრიტერიუმებში ქულებით შეფასება განიმარტება შემდეგნაირად:

ბ) თითოეული კრიტერიუმი ფასდება მინიმუმ 1, მაქსიმუმ 5 ქულით.

გ) ოთხივე კრიტერიუმისათვის ჯამურად მინიმალური შესაძლო შეფასებაა 4, მაქსიმალური - 20 ქულა.

დ) თანაბარი ქულების დაგროვების შემთხვევაში, უპირატესობა მიენიჭება იმ საკონკურსო განაცხადს, რომელიც ჯამურად მაღალ ქულას დააგროვებს თანმიმდევრულად პირველ, შემდეგ მეორე, მესამე და მეოთხე კრიტერიუმებში.

ე) შემაჯამებელი შეფასება უნდა შეესაბამებოდეს კრიტერიუმების 5-ქულიანი (1-5) სისტემით შეფასებას და განიმარტება შემდეგნაირად:

ქულა	შეფასება	განმარტება
1	სუსტი	საკონკურსო განაცხადი არაადეკვატურად პასუხობს მოცემულ ქვეკრიტერიუმს, გართულებულია შეფასება არასაკმარისი, ბუნდოვანი ან შეუსაბამო ინფორმაციის გამო.
2	დამაკმაყოფილებელი	საკონკურსო განაცხადი ზოგადად პასუხობს მოცემულ ქვეკრიტერიუმს, მაგრამ აქვს მნიშვნელოვანი უზუსტობები და სუსტი მხარეები.
3	კარგი	საკონკურსო განაცხადი კარგად პასუხობს მოცემულ ქვეკრიტერიუმს, მაგრამ აქვს გარკვეული ხარვეზები და საჭიროებს გაუმჯობესებას.
4	ძალიან კარგი	საკონკურსო განაცხადი ძალიან კარგად, ზუსტად პასუხობს მოცემულ ქვეკრიტერიუმს. გამოკვეთილია ორიგინალურობა და სამეცნიერო პოტენციალი, თუმცა შესაძლებელია გარკვეულწილად დახვეწა.
5	საუკეთესო	საკონკურსო განაცხადი საუკეთესოდ პასუხობს მოცემულ ქვეკრიტერიუმს, შეიძლება არსებობდეს უმნიშვნელო ერთეული შენიშვნები, რომლებიც არ ეხება სამეცნიერო

		პოტენციალს.
--	--	-------------